

NOS GRANDINAN TA CONTA

BIBIANO WERLEMAN

Sr. Werleman ta tata di Djiek cu tambe a conta un parti di locual e ta corda di historia di Aruba. E ta corda cu for di su 15 aña el a bay Cuba caminda añanan el a bay sembra caña. Na aña 1921 el a regresa Aruba caminda e tabata tin e trabao di coba pos, bati bloki, buzea. El a traha tambe 3 aña na Lago pero no a gusta e trabao ey mucho.

E trabao cu si el a gusta hopi ta e trabao di corta aloë. Tambe el a yuda den restaura Astoria Hotel. Sr. Werleman tabata un persona tambe cu ta gusta pisca y el bisa cu el a pisca te cu su 60 aña. E tabata pisca antes cu

boto di bela y tabata bay pisca keda un dia pa otro y ta regresa. E ta corda tambe cu el a bay pisca 6 luna tras di otro. E tabata bay tur añochi pa e yega Playa pa despues e bay pisca.

E ta corda tambe cu tempo di

guera e tabata traha den Lago y ora cu nan bay pisca nan no mag di cende ni un cigar ariba laman.

Sr. Werleman ta conta cu el a biaha varios biaha pa Colombia pa atencion medico y tambe pa Corsow.



DANIEL WERLEMAN

Mihor conosi como Djiek

Djiek hopi conoce como e persona cu semper ta dispuesto pa yuda ora cu tin hendenan ta haya nan mes den problema cu lama. E ta conta cu el a cuminsa pisca for di su 14 aña te cu awor. Ta hopi aventura el a pasa na lama y un di nan cu e ta corda ta tempo e cu 3 amigo mas a keda 3 dia lamar sin cuminda y awa. Nan a keda 2 dia sin come nada, te na di 3 dia nan a bin come pisca curu.

E ta corda tambe cu el a yega di sambuya pa busca un persona perdi den lama na Boedoei, pero no a haye y nunca mas nan no a haya e persona tampoco.

Promenan aya e ta corda cu nan tabata bay pisca cu pagaai cu rema, despues el a logra bin na un motor.

Antes tabata drumi porta habri tambe y abao, awor no por haci esey mas. Djiek ta conta cu poco tempo pasa mes nan a bay cu un television nobo for di den su cas. E ta conta cu e no a yega di traha ningun caminda nunca, pero cu semper su trabao ta di pisca.

